

2014-mi ilassutitut aningaasaliissutitut inatsisissatut siunnersuut

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Inatsisissatut siunnersuutip aappassaaneerpeqarnerani saqqummiunneqartoq

Aningaasaqarnermut Akileraartarnermullu Ataatsimiititaliap suliarinninnermini ukuningga inuttaqarpoq:

Inatsisartunut ilaasortaq Jens Imanuelsen, Siumut, siulittaasoq
Inatsisartunut ilaasortaq Steen Lynge, Atassut, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Tillie Martinussen, Demokraatit
Inatsisartunut ilaasortaq Naaja Nathanielsen, Inuit Ataqatigiit
Inatsisartunut ilaasortaq Sara Olsvig, Inuit Ataqatigiit
Inatsisartunut ilaasortaq Peter Olsen, Inuit Ataqatigiit

Ataatsimiititaliap ulloq 10. marts 2015-imi siullermeerinerup kingorna siunnersuut misissorpaa.

Imarisaanut nalunaarsuut:

1. Aallaqqaasiut	3
2. Ilassutitut aningaasaliissutitut inatsit	4
3. Naalakkersuisut 2014-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat	7
4. 2014-mi aningaasanut inatsit aamma 2014-mi ilassutitut aningaasaliissutitut inatsisissatut siunnersuut – kisitsisit pingaarnerit aningaasaleeriaatsinullu agguataarinerit	9
5. Oqaasertaliussanik allannguinerit (inatsisissatut siunnersuummi § 2)	11
6. Sillimatinut kontonit 20.11.50-imit aamma 20.11.52-imit atugassiissutiginninnerit	11
7. Naalakkersuisut nuussineritut Aningaasaqarnermut Akileraartarnermullu Ataatsimiititaliap oqaaseqaatai	12
8. Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigiumasai allat	13
9. 2014-mi aningaasaliissuteqarnissamik suliassanut ataasiakkaanut oqaaseqaatit	14
10. Aningaasaqarnermut Akileraartarnermullu Ataatsimiititaliap kaammattuutai	18
11. Aningaasaqarnermut Akileraartarnermullu Ataatsimiititaliap inassuteqaatai	19

Ilanngussat:

Ilanngussaq A Aningaasaqarnermut Akileraartarnermullu Ataatsimiititaliap 2014-mi aalajangiiffigisai Naalakkersuisunit il.il. akissutunik ilallit. (Suliaq nr. 14-653 – 13-683).

Ilanngussaq B Suliaq nr. 14-662, 14-675, 14-678 aamma 14-679 pillugit Aningaasaqarnermut Akileraartarnermullu Ataatsimiititaliap apeqqutai.

1. Aallaqqaasiut

Inatsisartut 2014-mi ilassutitut aningaasaliissutitut inatsisissaattut siunnersuut Aningaasaqarnermut Naalakkersuisumit Inatsisartut 2015-imi upernaakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Akileraartarnermullu Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinninnissaannut isumaliutissiissuteqarluni.

Nunatta karsiata naatsorsuutai, Sanaartugassanut Iluarsagassanullu Aningaasaateqarfik aammalu missingersuutitut ingerlaavartumik malitseqartitsissutit ilassutitut aningaasaliissutitut inatsit peqatigalugu tassaapput pisortat aningaasaqarnermik aqutsineranni pingaarutilittut inissisimasut. Aningaasaqarneq siumut isiginerinnakkut aqunneqarsinnaanngilaq; paasisaqarnerorusukkaanni kingumut qiviarnissaq aamma pisariaqarpoq.

Maleruagassat tungaannit isigalugu eqqaasitsissutigineqassaaq ilassutitut aningaasaliissutitut inatsisip imarimmagit aningaasaliissutitut allannguutit

- Inatsisartunit,
- Aningaasaqarnermut Akileraartarnermullu Ataatsimiititaliamit aamma
- Naalakkersuisunit oqaasertaliussani piginnaatinneqarlutik akuerineqartut.

Pingaartumik aningaasaliissutitut allannguutit Naalakkersuisunit akuerineqartut ilassutitut aningaasaliissutitut inatsisikkut Inatsisartunut ilaasortanit tamanillu aatsaat takuneqarsinnaalersarput. Taamaattumik Naalakkersuisut allanngugaat taakku aningaasaqarnikkut annertuumik pingaaruteqarsinnaasut eqqortumik tunngaveqarluni pisimanersut nalilissallugu Aningaasaqarnermut Akileraartarnermullu Ataatsimiititaliaq – naggataatigullu Inatsisartut – suliaasaqarput annikinngitsumik.

Aningaasaliissuteqarnissamik qinnuteqaatit Naalakkersuisunit ukiup siuliani tiguneqartut ilaat isumaliutissiissummi matumani Aningaasaqarnermut Akileraartarnermullu Ataatsimiititaliamit paasisutissiissutigineqarput. Aalajangiinerit tamakkerlugit taakkunungalu atatillugu allaqatiginnissutit isumaliutissiissummut ilanngussaq A-tut ilanngunneqarput.

Aalajangiinerit ilaat taakku arlallit aningaasaliissutinik allannguinerit aalajangersimasut kisiisa pinnagit aammali maleruagassanik atuineq, inatsisunik qanoq paasinninnissaq kiisalu aningaasaqarnikkut naalakkersuinikkullu anguniakkat pillugit tunngaviusumik isigineqartariaqartunik pingaarutilinnik aamma imaqarput. Taamaattumillu Aningaasaqarnermut Akileraartarnermullu Ataatsimiititaliamut ilaasortaniinnaanngitsoq aammali Inatsisartunut ilaasortanit tamanit minnerungitsumillu Naalakkersuisunut ilaasortanit aqutsisoqarfiinillu atuarneqartariaqarlutillu ilisimaneqartariaqarput.

Aningaasaqarnermut Akileraartarnermullu Ataatsimiititaliap suliaata ilaanik pingaarutilimmik taamatut sukumiisumik issuaanikkut isumaliutissiissut una Aningaasaqarnermut Akileraartarnermullu Ataatsimiititaliap 2014-imi ukiumoortumik nalunaarutaatut taaneqarsinnaavoq.

Isumaliutissiissut ima aaqqissugaavoq:

Isumaliutissiissutip matuma immikkoortuani 2-mi missingersuutit pillugit inatsimmi aalajangersakkat aammalu ilassutitut aningaasaliissutitut inatsisissatut siunnersuummik saqqummiussisarnermut inatsisitigut tunngaviit ataatsimiititaliamit takussutissiissutigineqarput.

Aningaasanut inatsimmi 2014-mi angusassatut missingersuutigineqartumut sanilliullugu 2014-mi aalajangiinerit aningaasatigut kingunerisaat immikkoortuni 3-4-imi paasissutissiissutigineqarput.

Oqaasertaliussanut aningaasanullu inatsimmi sillimmatitut kontoni 2014-mi allannguinerit immikkoortoq 5, 6 aamma 7-imi misissorneqarlutillu naliliiffigineqarput.

Inatsisissatut siunnersuummi ajornartorsiutit, kukkunerit amigaatillu immikkoortoq 8-mi nassuiaateqarfigineqarput.

Aningaasaliissuteqarnissamik suliassat 2014-mi Aningaasaqarnermut Akileraartarnermullu Ataatsimiititaliamit sularineqartut tunngaviusutut isigineqartariaqarnerpaat arlallit immikkoortoq 9-mi eqikkaavigineqarput. Ukiut siuliini ajornartorsiutaasimasut isumaliutigineqarsimasullu arlallit inernilivigineqarput, taamaattumillu immikkoortoq taanna isumaliutissiissummi pingaarnert ilaattut isigineqartariaqarpoq. Taamaattumillu immikkoortumi matumani oqaatigineqartut oqaaseqartartunit aappassaaneerinninnermi sukumiisumik isummerfigineqarnissaat ataatsimiititaliamit assut neriuutigineqarpoq.

Ataatsimiititaliaq immikkoortoq 10-imi inatsisissatut siunnersuummut arlalinnik kaammattuteqarpoq kiisalu immikkoortoq 11-imi inatsisissatut siunnersuummut ataatsimiititaliaq inassuteqaateqarluni.

Inatsisissatut siunnersuutip aappassaaneerineqarnissaanut taama oqaaseqarluni Aningaasaqarnermut Akileraartarnermullu Ataatsimiititaliaq matumuuna isumaliutissiissuteqarpoq.

2. Ilassutitut aningaasaliissutitut inatsit

2.1 Ilassutitut aningaasaliissutitut inatsisissatut siunnersuummik saqqummiussineq

§ 26, imm. 3-mi aalajangersarneqarpoq Naalakkersuisut ilassutitut aningaasaliissutitut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqqusumik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Suleriaaseq pillugu Ataatsimiititaliap

aamma Aningaasaqarnermut Akileraartarnermullu Ataatsimiititaliap siusinnerusukkut aalajangi-gaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2014-mi aningaasanut inatsit aamma 2014-imi ilassutitut aningaasaliissutitut inatsit katillutik aningaasaliissutit oqaasertaliussallu 2014-mi atuuttut suunerinik takussutissiisussaapput. Taamaalillutik aningaasaliissutit 2014-mi aningaasanut inatsimmi aamma 2014-mi ilassutitut aningaasaliissutitut inatsimmi ilaatinneqartut, taakkunungalugu ilanngullugit sanaartugassanut tunngasuni suliassanut aningaasaliissutit, Nunatta Karsiata 2014-mi naatsorsuutaanut aamma 2014-imi Sanaartugassanut Iluarsagassanullu Aningaasaateqarfik pillugu Nassuiaammut tunngaviupput. Nunatta Karsiata naatsorsuutai Sanaartornerlu pillugu Nassuiaat Inatsisartut upernaakkut ataatsimiinneranni nalinginnaasumik saqqummiunneqartarput.

2.2 Ilassutitut aningaasaliissutitut inatsisip imarisai

Ilassutitut aningaasaliissutitut inatsisip imarisarparaa inatsisip ileqqussat naapertorlugit oqaasertaa, ukununga tunngasunik nalinginnaasumik marlunnik paragrafeqartartoq:

- aningaasaliissutit allannguutaat, aamma
- oqaasertaliussat allannguutaat.

Ilassutitut aningaasaliissutitut inatsimmiittarpoq Aningaasaliissutitut takussutissiaq, ilanngussaq 1, kontonut pingaarnernut allannguuteqartunut tunngatillugu aningaasanut inatsimmi aningaasaliissutitut, ilassutitut aningaasaliissutitut aamma aningaasaliissutitut tamarmiusunik ilaatigut takussutissiisoq.

Taakku saniatigut ilassutitut aningaasaliissutitut inatsisip imarai inatsisip oqaasertaanut nassuiaatit. Nassuiaatit imaraat

- missingersuutitut ilanngussat, ilassutitut aningaasaliissutitut ataasiakkaanut tunngatillugu missingersuusiormi tunngavilersuutitut imallit, kiisalu
- oqaasertaliussanut nassuiaatit.

Taakku saniatigut ilassutitut aningaasaliissutitut aningaasaleeriaatsinut, oqartussaaffeqarfinnut suliassa-qarfinnullu agguataarnerinut takussutissiaq Naalakkersuisut 2014-mi ilassutitut aningaasaliissutitut inatsisissatut siunnersuutaanni ilanngunneqarsimavoq.

2.3 Aningaasaliissutitut allannguinnissamik qinnuteqaateqarnissamut piunasaqaatit

Missingersuusiormut inatsimmi § 28, imm. 2-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat tassaassasut:

- pingaarutillit, aamma
- aningaasanut inatsisissap suliarinerani sillimaffigereerneaarsinnaasimangitsunut tunngasut.

Ulluinnarni periususartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutit allangortinneqarnissaannik qinnuteqaammik Aningaasaqarnermut Akileraartarnermullu Ataatsimiititaliamut nassiussisarpoq. Pappialat atortussat nassiunneqartut kontonut pingaarnernut, aningaasaliissutinik allangortitsiffiginiarlugit qinnuteqaatigineqartunut, missingersuutitut ilanngussanik imaqtussaapput.

Taamaalilluni allannguutissatut qinnuteqaatigineqartup nassuiarnerata tunngavilersuutitaatalu suliap nalilersuiffiginissaanut naammattumik sukumiissuseqarnissaat pingaaruteqarpoq. Erseqqissarneqassaaq allannguutip aningaasanut inatsimmi tunngavissaatitaasunut naleqqiullugu qanoq ittuunera pingaarnepaatinneqassasoq.

2.4 Aningaasaliissutit iliutsillu oqaasertaliussatigut aalajangersakkanik tunngavillit

Missingersuusiornermut inatsimmi § 25 - § 29-mi aningaasaliissutit nutaat allangortitalluunniit pillugit aalajangersakkat malittarisassiuunneqarput, taamaalillutillu Ilassutitut aningaasaliissutitut inatsimmi aalajangersakkat tunngaviusut taakkunani malittarisassiuunneqarput. § 25, imm. 1-imi aalajangersarneqarpoq

„ukiup aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqaarnissamullu imaluunniit aningaasaliissutinik oqaasertaliussanilluunniit allangortitsinissamut piumasaaqaataasoq Inatsisartut Aningaasaqarnermut Akileraartarnermullu Ataatsimiititaliaat Inatsisartut sinnerlugit akuersissuteqaqqaarsimassasoq.“

Aalajangersakkakkut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Akileraartarnermullu Ataatsimiititaliaq sioqqutsisumik akuersissuteqareersimatinnagu aningaasartuutigeqqusaanngitsut.

§ 26-mi aalajangersarneqarpoq:

“...ukiup aningaasanut inatsisip atuuffiata ingerlanerani nutaamik aningaasaliissutigineqartut oqaasertaliunneqartullu imaluunniit aningaasaliissutit oqaasertaliussallu allangortinneqartut aningaasaliissutigineqarnermik kingorna ilassutitut aningaasaliissutitut inatsimmut ilanngunneqartassasut.”

2.5 Aningaasartuutinik isertitanillu nakkutillineq

Missingersuutit pillugit inatsit naapertorlugu missingersuutit pillugit ilisimatitsissummik ataatsimik ukiumoortumik Inatsisartunut saqqummiussinissaq Naalakkersuisut taamaallaat pisussaaffigaat. Tassani augustip naanerani missingersuutitut kisitsisit tunngaviugajuttarsimapput. 2005-imili taamani Aningaasaqarnermut Ataatsimiititaliaasup Naalakkersuisuusullu isumaqatigiissutigaaq aprilip naanerani pisariaqartitsinernilu allani missingersuutitut ilisimatitsissut ilanngullugu Naalakkersuisut siunissami suliarisallissagaat.

Piffissamut 2014-imi januarimit septembarimut missingersuutit pillugit ilisimatitsissummik Naalakkersuisut nassiussinissaat aatsaat 25. november 2014-imi piviusunnngortinneqarmat ataatsimiititaliamit oqaatigineqassaaq. Ataatsimiititaliamit kissaatiginartinneqarneruvoq piffissamut januarimit augustimut missingersuutit pillugit ilisimatitsissut ukiakkut ataatsimiinnerit aallartinnerinut atatillugu nassiunneqartarpat.

3. Naalakkersuisut 2014-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat

Aningaasaqarnermut Akileraartarnermullu Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- Ingerlatsinerimut aningaasaliissutit
- tapiissutitut aningaasaliissutit, aamma
- sanaartornermut aningaasaliissutit.

Taakku avataatigut soorunami ilaapput oqaasertaliussat suliasallu allat, pissutsit immikkut ittut pissutigalugit Naalakkersuisut atugassiinissaminni ataatsimiititaliamut akueritittariaqarsimasaat.

Nutaatut aningaasaliissuteqarnissamik aningaasaliissutinilluunniit allanngortitsinissamik, oqaasertaliussassatut siunnersuutitut kiisalu immikkut ittumik atugassiissuteqarnissamik Naalakkersuisut qinnuteqaatitut saqqummiussa 31-it Aningaasaqarnermut Akileraartarnermullu Ataatsimiititaliamit 2014-imi suliarineqarput. 2014-mi ukiunilu siuliini suliat amerlassusiat takussutissiami ataaniittumi takuneqarsinnaavoq.

Ukioq	Suliat amerlassusiat
2001	66
2002	48
2003	57
2004	82
2005	69
2006	56
2007	84
2008	93
2009	58
2010	64
2011	44
2012	51
2013	36
2014	31

Kisitsisinit takuneqarsinnaasutut suliassat ataatsimiititaliamit suliarineqartussat 2008-mili ikiliar-tuaarsimasutut isikkoqarput. Tamanna pitsaasuvoq, tassami aningaasaliissuteqarnissamik Aningaa-saqarnermut Akileraartarnermullu Ataatsimiititaliamut amerlasuunik suliassanngortitsisarneq nunat-ta karsiata aningaasartuutaanik ataatsimut pingaarnersiunerup aningaasanut inatsimmi takuneqar-sinnaanissaanik missingersuusiortarnermut inatsimmi tunngavissaritinneqartumut ikorfartuutaasutut isigineqarsinnaanngimmat.

Suliassat aalajangiiffigisassat 31-it pineqartut Aningaasaqarnermut Naalackersuisunit tiguneqarner-mik kinguninngua Aningaasaqarnermut Akileraartarnermullu Ataatsimiititaliamit nalinginnaasumik suliarineqartarsimapput.

Suliassanit 31-init taaneqartunit 11-it (35 %-it missaata nalingi) piffissami 1. septemberimit 2014-mi decemberip naanissaata tungaanut Naalackersuisunit suliarineqarsimasut Aningaasaqarnermut Akileraartarnermullu Ataatsimiititaliap paasissutissiissutigisinnaavaa.

Ukiuni siuliini ima agguataarsimapput:

2004-mi sep. – dec. suliassanit 82-init 44-t suliarineqarsimapput, tassa 54 %-it nalingi.
2005-mi sep. – dec suliassanit 69-init 35-t suliarineqarsimapput, tassa 51 %-it nalingi.
2006-mi sep. – dec suliassanit 56-init 30-it suliarineqarsimapput, tassa 54 %-it nalingi.
2007-mi sep. – dec suliassanit 84-init 31-it suliarineqarsimapput, tassa 37 %-it nalingi.
2008-mi sep. – dec suliassanit 93-init 28-it suliarineqarsimapput, tassa 30 %-it nalingi.
2009-mi sep. – dec suliassanit 58-init 28-it suliarineqarsimapput, tassa 48 %-it nalingi.
2010-mi sep. – dec suliassanit 64-init 30-t suliarineqarsimapput, tassa 47 %-it nalingi.
2011-mi sep. – dec suliassanit 44-init 14-it suliarineqarsimapput, tassa 32 %-it nalingi.
2012-mi sep. – dec suliassanit 51-init 23-it suliarineqarsimapput, tassa 45 %-it nalingi.
2013-mi sep. – dec suliassanit 36-init 13-it suliarineqarsimapput, tassa 36 %-it nalingi.

Ukiup taamaalereernerani qinnuteqartoqartillugu aningaasat atorneqareerneranni aningaasaliissu-teqarnissaq pineqartoq aarleqqutigineqarsinnaavoq. Taamaattumik ajornartorsiut taanna Naalak-kersuisunit suli eqqumaffigineqartariaqarpoq, missingersuusiortarnermummi inatsit unioqqutillugu aningaasat atorneqareersut aningaasaliissutinik akuersissuteqarnissaq Aningaasaqarnermut Akile-raartarnermullu Ataatsimiititaliamit kissaatigineqanngimmat.

Aalajangiiffigisassatut siuliassat pineqartut 31-it 2014-imeersut Aningaasaqarnermut Akileraar-tarnermullu Ataatsimiititaliamit ima amerlatigisoriarluni suliarineqarput:

- Suliassat 29-t ataasiarluni suliarineqarput aammalu
- Suliassat marluk marloriarluni suliarineqarlutik.

Taamaalillutik Aningaasaqarnermut Akileraartarnermullu Ataatsimiititaliap aalajangiineratigut suli-
tamat tamarmik naammassillugit suliarineqarput.

Suliaq nr. 14-676-imi Naalakkersuisut qinnuteqaataat Aningaasaqarnermut Akileraartarnermullu Ataatsimiititaliamit itigartinneqarpoq, aamma takuuk isumaliutissiisummi immikkoortoq 9.6. Suliaq nr. 14-677-imi Naalakkersuisut qinnuteqaataat Aningaasaqarnermut Akileraartarnermullu Ataatsimiititaliamit suliariumaneqanngilaq. Suliat naammassineqartut sinnerini tamani Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit akuerineqarsimapput.

Suliani arlalinni Naalakkersuisut ilassutitut aningaasaliissuteqarnissamik qinnuteqaataannik ataatsimiititaliap akuersinera suliat suussusiinik pissuteqartumik missingersuutitut ilanngussatigut takussutissaqartinneqartanngikkaluartoq, sulianut 2014-mi Inatsisartut Aningaasaqarnermut Ataatsimiititaliaannit akuerineqartunut missingersuutitut ilanngussat pisariaqartut 2014-mut ilassutitut aningaasaliissutitut inatsisissatut siunnersuummut ilanngunneqarsimasut Aningaasaqarnermut Ataatsimiititaliamit oqaatigineqassaaq.

4. 2014-mi aningaasanut inatsit aamma 2014-mi ilassutitut aningaasaliissutitut inatsisissatut siunnersuut – kisitsisit pingaarnerit aningaasaleeriaatsinullu agguataarinerit

4.1 Kisitsisit pingaarnerit aningaasanngorlugit

2014-mi aningaasanut inatsimmi aamma 2014-mi ilassutitut aningaasaliissutitut inatsisissatut siunnersuummi kisitsisit pingaarnerit aningaasanngorlugit takussutissiarineqarnerat 2014-mi ilassutitut aningaasaliissutitut inatsisissatut Naalakkersuisut siunnersuutaata danskisuuani qupperneq 22-imi kalaallisuuani quppernemi 21-22-imi takuneqarsinnaapput, taakkulu innersuussutigineqarput.

Aningaasaliissutinik allannguutit ilanngaattissat ilanngaatigereerlugit 92,966 mio. kr.-inik aningaasartuuteqarnermik nalillit Aningaasaqarnermut Akileraartarnermullu Ataatsimiititaliamit 2014-mi akuerineqarput (missingersuutitigut ajorseriaat). Kiisalu Suleriaaseq pillugu Inatsisartut Ataatsimiititaliaata aningaasaliissutitut allannguutit ilanngaattissat ilanngaatigereerlugit 300.000 kr.-inik sunnuteqartussat aamma akuerai (missingersuutitigut ajorseriaat). Tamatuma saniatigut partiit qineqqusaarnerannut tapiissutitut aammalu qinersinermut aningaasartuutitut Inatsisartut aningaasaliissuteqarnerisigut 2014-imi IST-kkut angusat 4,754 mio. kr.-inik sunnerneqarput (missingersuutitigut ajorseriaat). Tamatuma kingorna IST-kkut angusat 51,5 mio. kr.-inik amigartoorfiussatut missingerneqarput. Taamatuttaaq ilassutitut aningaasaliissutit akuerineqartut kinguneraat IS-imi angusassatut missingersuutigineqartut 148,0 mio. kr.-inik ajoarseriarnerat, taamaalillunilu ukiumut aningaasanut inatsiseqarfimmut 2014-imut IS-imi amigartoorutissatut missingersuutigineqartut 127,2 mio. kr.-iullutik.

Matumani eqqaamasariaqarpoq angusassatut missingersuutit inaarutaasumillu naatsorsuutitigut angusat assigiinngimmata. 2014-imi inaarutaasumik naatsorsuutitigut angusat 2014-mi Nunatta Karsiata naatsorsuutaanni, Inatsisartut upernaakkut ataatsimiinneranni saqqummiunneqarlutillu siullermeerneqartussatut naatsorsuutigineqartumi takuneqarsinnaapput.

4.2 Ilassutitut aningaasaliissutit (inatsisissatut siunnersuummi § 1) – allannguutit oqartusaasunit assigiinngitsunit pingasunit akuersissutigineqartut

Inatsisissatut siunnersuummi ilaapput ilassutitut aningaasaliissutit ukuninnga akuersissutigineqartut

- Naalakkersuisunit, oqaasertaliussanik innersuussinikkut
- Aningaasaqarnermut Akileraartarnermullu Ataatsimiititaliamit
- Inatsisartunit/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut Aningaasaliissutitut takussutissiami, inatsisissatut siunnersuummi ilanngussaq 1-imi, takuneqarsinnaapput. Allannguutit ataasiakkaat missingersuutitut ilanngussartaqarput, taakkunanilu allannguutit erseqqinnerusumik nassuiarneqarput. Ilangussaq 1-imi taamatullu missingersuutitut ilanngussani takuneqarsinnaassaaq Aningaasaqarnermut Akileraartarnermullu Ataatsimiititaliaq Naalakkersuisulluunniit imaluunniit Inatsisartut Suleriaaseq pillugu Ataatsimiititaliaat aningaasaliissutitut allannguisoqarnissaanik qanga akuersisimanersut suliarlu sorleq pineqarnersoq.

4.3 Naalakkersuisut oqaasertaliussamut innersuussillutik akuersissutigisaat

Oqaasertaliussat tunngavigalugit aningaasaliissutitut nuussinerit amerlasuut Naalakkersuisunit akuersissutigineqarput. Nuussinerit takku ataatsimut isigalugu ilanngaattissat ilanngaatigereerlugit missingersuutitut sunniuteqanngillat.

Naalakkersuisut aalajangiineranni tunngavissaatitaasut eqquutsinneqarsimanersut Aningaasaqarnermut Akileraartarnermullu Ataatsimiititaliaq erseqqinnerusumik naliliiffigisimavaa. Isumaliutissiisutit immikkoortuani 7.3-mi allassimasut innersuussutigineqarput.

4.4 Aningaasaqarnermut Akileraartarnermullu Ataatsimiititaliamit akuersissutigineqartut

Ingerlatsinermit aningaasaliissutit

Ingerlatsinermit aningaasaliissutitut allannguinerit ilanngaattissat ilanngaatigereerlugit 11,495 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. (Missingersuutitigut ajorseriaat).

Tapiissutitut aningaasaliissutit

Tapiissutitut aningaasaliissutitut allannguinerit ilanngaattissat ilanngaatigereerlugit 3,085 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. (Missingersuutitigut ajorseriaat).

Aningaasaliissutit inatsisitigut pisussaaffigisat

Aningaasaqarnermut Akileraartarnermullu Ataatsimiititaliamit aningaasaliissutinik inatsisitigut pi-sussaaffigisanik allannguinnissamik akuersissuteqartoqanngilaq, tamannalu missingersuusioner-
mut inatsimmi § 27-mut naapertuuppoq

Isertitassatut aningaasaliissutit

Isertitassatut aningaasaliissutinik allannguinnissamik Aningaasaqarnermut Akileraartarnermullu Ataatsimiititaliaq 2014-mi ilanngaattissat ilanngaatigereerlugit -53,0 mio. kr.-inik sunnuteqar-tussamik akuersissuteqarsimavoq (Missingersuutitigut pitsanngoriaat, tamatumanili suliap 14-659-
ip aamma 14-662-ip pillugit aningaasartuutit aningaasalersorneqarnissaat siunertarineqarluni).

Sanaartugassanut aningaasaliissutit

Sanaartugassanut aningaasaliissutinik allannguinnissamik qinnuteqaatit ilanngaattissat ilanngaatige-reerlugit 131,386 mio. kr.-inik nalillit Aningaasaqarnermut Akileraartarnermullu Ataatsimiitita-liamit akuersissutigineqarput (Missingersuutitigut ajorseriaat).

4.5 Inatsisartut Suleriaaseq pillugu Ataatsimiititaliaannit akuersissutigineqartut (suliassaqarfik 01)

Ilassutitut aningaasaliissuteqarnissamik qinnuteqaatinik ilanngaattissat ilanngaatigereerlugit katillu-git 5,054 mio. kr.-inik nalillit Suleriaaseq pillugu Ataatsimiititaliap akuersissutigai. (Missin-gersuutitigut ajorseriaat). Taamaallunilu partiit qineqqusaarnerannut tapiissutinut, qinersinermut aningaasartuutitut aammalu naalakkersuinikkut suliner-
mut aningaasaliissuteqartoqarpoq.

5. Oqaasertaliussanik allannguinerit (inatsisissatut siunnersuummi § 2)

Oqaasertaliussat marluk inatsisissatut siunnersuummi ilanngunneqarput. Oqaasertaliussat akuerine-qartut taakku 2014-imi aningaasanut inatsimmi oqaasertaliussat taamaaqqataat taarserpaat/ilas-suserpaat. Taakku marluk Aningaasaqarnermut Akileraartarnermullu Ataatsimiititaliap akuersis-suteqarnera tunngavigalugu ilanngunneqarput. Oqaasertaliussamulli ilassut Nukissiorfiit 2014-imi inaallagissamut, imermut kiassarnermullu akigititaanut tunngasoq ataatsimiititaliamit suliaq nr. 14-654-imi akuerineqartoq ataatsimiititaliap amigaatigaa. Takuuk immikkoortoq 9.2 matuma kingulianiittoq.

6. Sillimmatinut kontonit 20.11.50-imit aamma 20.11.52-imit atugassiissutiginninnerit

2014-mut aningaasanut inatsit kontomi pingaarnermi 20.11.50-imi ingerlatsinermut sillimmatinik 10,0 mio. kr.-inik ilaqartillugu akuersissutigineqarpoq. Ingerlatsinermut sillimmatit tigusiffigine-qarnissaat/ilaneqarnissaat 2014-mi sisamariarluni akuersissutigineqarsimavoq, tamatumalu kingorna 31. december 2014-mi konto pingaarnermi 0 kr.-it sinnerussimallutik. Taamaallutillu ingerlatsi-
nermut sillimmatit ilanngaaseereerluni 10,0 mio. kr.-inik 2014-imi tigusiffigineqarsimapput.

Sillimatinut kontonit aningaasalersugaasunik suliniutinik nutaanik piviusunngortitsinerup aallar-titsinerullu missingersuusiornermut inatsimmi § 5, ukiumi aningaasanut inatsiseqarfiusumi Inatsisartut aningaasaqarnermik ataatsimoortumik tulleriarinerannik aningaasanut inatsisip erser-sitsisuunissaanik aalajangersaasoq, naapertorlugu pinissaa pingaaruteqarpoq. Taamatut ataatsimoor-tumik tulleriarinerermut taarsiullugu atorneqarsinnaavoq “ingerlaavartumik tulleriarineq”, taannali tulleriarineruinngilaq, tassaallunili inuiaqatigiit aningaasaataannik nalaatsortumik pitsaaner-paajunngitsumillu atuineq.

Tamatuma saniatigut Namminersorlutik Oqartussat aqutsivianni piviusorsortumik missinger-suusiortarnissamut missingersuutinillu malitseqartitsisarnissamut kajumilersitsinissaq pisariaqartoq qulakkeerneqarsinnaaqqullugu sillimmatitut aningaasaliussat aallaavittut isigalugu sapinngisamik killeqartinneqarlutillu siunertamut aalajangersimasumut immikkoortinneqartariaqarnerat ukiut siuliinisulli Aningaasaqarnermut Akileraartarnermullu Ataatsimiititaliamit oqaatigineqassaaq.

7. Naalackersuisut nuussinernut Aningaasaqarnermut Akileraartarnermullu Ataatsi-miititaliap oqaaseqaatai

7.1 Ataatsimut isigalugu

Aningaasanut inatsimmi oqaasertaliussat aammalu oqaasertaliussat, Aningaasaqarnermut Akile-raartarnermullu Ataatsimiititaliamit kingusinnerusukkut akuersissutigineqartut 2014-milu ilassutitut aningaasaliissutinut inatsimmi ilanngunneqartut naapertorlugit kontot pingarnerit assigiinngitsut kiisalu sanaartornerup iluani suliassat akornanni nuussinissanut Naalackersuisut piginnaatin-neqarput.

Nuussinissat akuersissutigineqarsimatillugit aningaasaliissutinik allanngortitsinerit pinerit tamaasa inatsisissatut siunnersuummi aningaasaliissutinut takussutissiap, ilanngussaq 1-ip, immikkoortor-taani (kolonne) ilanngunneqartarput. Missingersuutinut ilanngussani nuussinernut tunngavilersuutit aammalu Naalackersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisuusut pillugit paasissutissat nalunaarneqassapput.

7.2 Sulisorisat pillugit paasissutissat

Missingersuusiornermut malittarisassami 2008-meersumi immikkoortoq 5.2 Aningaasaqarnermut Akileraartarnermullu Ataatsimiititaliamit innersuussutigineqassaaq, tassani sulisorisassatut naatsor-suutigisat taakkulu naatsorsorneqartarnerat pillugit paasissutissiissuteqarnissamut Naalackersuisut najoqqutassanik pitsaalluinnartunik aalajangersaasimapput.

Suliffiit aalajangersimasumik amerlassusilikkat pineqannginnerat erseqqissarneqarsinnaaqqullugu aningaasaliissutinut inatsisissani aggersuni sulisorisassatut naatsorsuutigisat pillugit takussutissiani ukioq naallugu sulisorisat atorneqartalernissaat Aningaasaqarnermut Akileraartarnermullu Ataatsi-miititaliap ukioq manna aammaarluni siunnersuutigissavaa. Taamaalilluni oqariaaseq ukioq naal-

lugu sulisorisat eqqornerusutut isigineqarpoq, soorluttaaq sulisorisassatut naatsorsuutigisat aalajangersimasumik atorffittut paatsoorneqarlutik paasineqarsinnaanerit killilerneqassasoq.

7.3 Naalakkersuisut aningaasaliissutinik nuussineranni inatsisitigut tunngavissat

Inatsisitigut tunngavissaatit naapertorlugit Naalakkersuisut nuussineri pisimnersut Aningaasaqarnermut Akileraartarnermullu Ataatsimiititaliamit erseqqinnerusumik naliliiffigineqarsimavoq. Ataatsimut isigalugu pissutsinik tamatumunnga naapertuutinnigitsunik ataatsimiititaliaq nalaataqarsimannigilaq.

8. Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigumasai allat

8.1 Nalinginnaasumik oqaaseqaatit

Aallaqqaasiutigalugu isumaliutissiissummi immikkoortoq 3 innersuussutigineqarpoq, tassani suliat amerlassusiat, qinnuteqaatinik Aningaasaqarnermut Akileraartarnermullu Ataatsimiititaliap suliarininnerata inernerit naapertorlugit agguataakkamik nalunaarsorneqarsimallutik.

Tamatuma saniatigut isumaliutissiissummi ilanngussaq A innersuussutigineqassaaq, tassani Aningaasaqarnermut Ataatsimiititaliap ukiumi qaangiuttumi aalajangigai tamakkerlutik suliap normukkaarlugit ilanngunneqarsimapput. Aalajangiinerni arlalinni annertunerusumik paasissutisseeqqullugit missingersuutinulluunniit ilanngussamik nutaamik nassiusseqqullugit Naalakkersuisut ataatsimiititaliamit qinnuigineqarsimapput. Taakkuttaaq pisariaqartillugu aalajangiinernut ataasiakkaanut kingullinngorlugit ilanngunneqarput.

Ilaatigut ilusiligaanermikkut inissitsiterneqarnermikkullu assigiissaarneqarnissaasa kiisalu aningaasaliissutinut tunngasut nassuiarneqarnerisa pitsaasuunissaasa qulakkeerneqarnissaat siunertaralugu missingersuutinut ilanngussat ilassutitut aningaasaliissutinut inatsimmi ilanngunneqannginneranni Naalakkersuisunit misissorneqartarnissaat Aningaasaqarnermut Ataatsimiititaliamit nalinginnaasumik naatsorsuutigineqarpoq. Inatsisissatut siunnersuutip Naalakkersuisuneersup pitsaasuunera sukumiisumik misissorneqarsimassasoq naatsorsuutigineqartariaqarpoq.

8.1.1 Sillimaffiginnissinnaasimanniginnissamik inatsimmi piunasaqaat

Ataatsimut isigalugu ukiumi qaangiuttumi aningaasaliissuteqarnissamik suliassat tunngavigalugit missingersuusiornermut inatsimmi § 28, imm. 2-p ataqqineqarnissaata erseqqissarneqarnissaa pisariaqarsorinarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allannortitsisoqarnissaanik qinnuteqaatit taamaallaat aningaasaqarnikkut iliussissanut pingaarutilinnut aammalu aningaasanut inatsisissap suliarinerani sillimaffigereerneqarsinnaasimannigitsunut tunngasuusassat.

Nassuerutigineqartariaqarporli 2014-mi aningaasaliissuteqarnissamik suliassanut arlalinnut tunnga-tillugu aalajangersagaq taaneqartoq pisariaqarneratut tamakkiisumik malinniarneqarsimanersoq nalorninarmat. Suliassalli taamaattut 2014-imi amerlagisassaanginnerat ataatsimiititaliamit nuannaarutigineqarpoq.

9. 2014-mi aningaasaliissuteqarnissamik suliassanut ataasiakkaanut oqaaseqaatit

Aningaasaliissuteqarnissamik qinnuteqaatit pillugit sulianut ataasiakkaanut ataatsimiititaliaq matuma kingulianiittunik oqaaseqaateqassaaq, tamatumalu saniatigut ataatsimiititaliap aala-jangiineri ilanngussaq A-mi ilanngunneqartut innersuussutigissallugit.

9.1 Narsami atuarfimmuut aningaasaliinerunissamik qinnuteqaat (14-653)

Atuarfimmuut sanaartornermut tunngasut kommuninut tunniunneqarnissaat pillugu suliami Naalak-kersuisut ingerlaqqissimanersut pillugu paasissutissinneqarnissani ataatsimiititaliap kissaatigaa. Tassunga atatillugu kommunit kingornagut aningaasanik nalinginnaasumik ingerlatsinermut nuussiinnarnissaannik kinguneqartussaangitsumik sanaartornermut aningaasanik kommuninut nalinginnaasumik nuussinissaq qanoq ingerlanneqarsinnaanersoq paasissutissiissutigineqassasoq ataatsimiititaliamit kissaatigineqarpoq.

9.2 Nukissiorfiit 2014-imi innaallagissamut, imermuut kiassarnermullu akigititassaasa akue-erineqarnissaat pillugu. (14-654)

Naalakkersuisut inassutigaaq "ilanngussaq 5-imi AI 73.94.02 Nukissiorfiit, ilassutitut aningaasaliis-sutissanut qinnuteqaat missingersuutitut sunniuteqartussaangitsoq Aningaasaqarnermut Akileraar-tarnermullu Ataatsimiititaliap akuerissagaa." Aalajangiinermini ataatsimiititaliaq Naalakkersuisunut ima allappoq:

"Oqaasertaliussaq nr. 2-mut naggasiutitut matuma kingulianiittut ilanngunneqassasut Naalakkersuisut siunnersuutigaaq:

Kotomut pingaarnermut 73.94.02 Nukissiorfiit:

"Akinut akissarsianullu nalileeriaatsit tunngavigalugit atuisunut nalinginnaasunut in-naallagissamut imermullu akit minnerpaaffissaannut annerpaaffissaannullu iluarsiinis-samut Naalakkersuisut piginnaatinneqarput. "

Kotomut pingaarnermut 73.94.02 Nukissiorfiit nassuiaatit

Nr. 2.

Una oqaasertaliussamut nr. 2-mut ilaliunneqassaaq:

"Atuisunut akinik annertuumik qaffaanissap pinngitsoortinneqarnissaa, aammalu Nukissiorfinni pisariaqanngitsumik akiliisinnaassutsimik annertusaanissap pinngit-

soortinneqarnissaa siunertaralugu, akinut akissarsianullu nalileeriaatsit tunngavigalugit akinik iluarsiinissamut Naalakkersuisut piginnaatinneqarput.

Akit Nukissiorfinni aningaasartuutit ineriartornerat malillugu iluarsineqartussaagalarput, tamannali akit qaffasinnerusumik qaffannerinik kinguneqartussaavoq.

2014-ip ingerlanerani Naalakkersuisut akit minnerpaaffissaannik annerpaaffissaannillu iluarseeriaasissamik siunnersuusiorniarpurput, tassanilu akit Nukissiorfinni aningaasartuutiviusut ineriartornerat malillugu ineriartortinneqarnissaat qulakkeerneqassaaq. Akeqartitseriaatsimik isumannaannerusumik akuersissuteqarnissaq siunertarineqarpoq.” (Nalunaarsuut: Oqaasertaliussap kiisalu oqaasertaliussamut nassuiaatip matuma siulianiittut danskisuuanni oqaasilerinikkut kukkunerit arlallit malunnaatillit iluarsineqarput. Oqaasertaliussaq inatsisip oqaasertaraa, taamaattumillu sukumiisumik misissorneqartussaalluni.)”

Oqaasertaliussamut ilanngussaq taanna ilassutitut aningaasaliissutitut inatsisissatut siunnersuummi matumani ilanngussaq 2-mi, oqaasertaliussani kiisalu oqaasertaliussanut nassuiaatini ilanngunneqarsimangitsoq ataatsimiititaliamit maluginiarneqarpoq. Siunnersuutit matuma aappasaaneerneqarnissaanut allannguutissatut siunnersuuteqartoqarnissaa naatsorsuutigineqarpoq.

9.3 Suliffissaaleqinerup annikillisinniarnera siunertaralugu iluarsaassillunilu sanaartugassatut suliassat siuartinneqarneri. (14-662)

Aningaasaqarnermut Akileraartarnermullu Ataatsimiititaliami amerlanerussuteqartut Siumut Atasutillu ilaasortaataasa suliaraq akueraat, ataatsimiititaliamili ikinnerussuteqartut Inuit Ataqtigiiit ilaasortaataasa suliaraq akuerinagu.

Aningaasaqarnermut Akileraartarnermullu Ataatsimiititaliamut ilassutitut aningaasaliissuteqarnissamik qinnuteqarnermi aallaavigineqarput qinnuteqaammi takussutissiaq 2 aammalu suliassat qinnuteqaammi takussutissiaq 1-imi allattorneqarsimasut.

Immikkut ittumik suliniutip aningaasalersorneqarnissaa takussutissiaq 2-mi eqikkaavigineqarpoq. 75 mio. kr.-it ukiup siuliani 2013-imi naatsorsuutitut pitsanngoriaataasut naatsorsuinerimut ilanngukkaanni ataatsimut isigalugu suliniutip kingunerisussaassavaa IST-p 69,3 mio. kr.-inik ajorseriarnera.

Ukiumi aningaasanut inatsiseqarfiusumi qinnuteqaatip kinguneraa sanaartornermik suliassanut salliutinneqartunut 2014-imilu allartinneqartussanut takussutissiaq 1-imi ilanngunneqartunut 174,2 mio. kr.-it immikkoortinneqartussaammata. Royal Greenlandip taarsigassarsianut akilersuutaasa siuartinneqarnerisigut taakku aningaasalersorneqartussaapput. Akilersuutitut akiliutigineqartut 50 mio. kr.-iupput. Tamatuma saniatigut suliaraq nr. 14-661-imi suliassanit naammassineqareersunit atuinikinnerussutitut nuussinikkut aningaasalersuisoqarpoq. Nuunneqartut 30,314 mio. kr.-iupput. Aningaasat sinneri IST-ip 2014-imi 94,3 mio. kr.-inik ajorseriaateqartinneratigut aningaasaler-

sorneqartussaapput. Tamatumunnga sanilliullugu ilassutitut aningaasaliissutitut inatsisissatut siunnersuummi matumani qupp. 22-mi allassimavoq suliffissaaleqinerup annikillissarnissaanut iluar-sagassanik sanaartugassanillu siuartitsineq, suliaq nr. 14-662 naapertorlugu, IST-mut 93,966 mio. kr.-inik sunnuteqartoq.

Suliamut malitseqartitsissutitut ataatsimiititaliaq apeqqutitut arlalinnik nassiussivoq. (Ilanngussaq B).

9.4 Kontomi pingaarnermi 87.75.03-mi Kommunit avatangiisitigut sanaartugaannut tapiissutitut tunngasumi, suliaqannut nassuiaatitut allanngineq. (14-673)

Suleqatigiissitap ataatsimiititaliap apeqqutaanut akissumminni Naalakkersuisut taasaata sulinera sumut killinnersoq paasissutissiissutitigineqassasoq ataatsimiititaliamit kissaatigineqarpoq.

9.5 Great Greenland A/S-imi aningaasaatitut akiliuteqarnissaq pillugu ilassutitut aningaasaliinissamik qinnuteqaat. (14-675)

Pissutsit marluk suliamut tunngatillugu qaqqineqarnissaat ataatsimiititaliamit pingaartinneqarpoq. Siullermik missingersuusiornermut inatsimmi § 28, imm. 2-p ataqqineqarnissaata erseqqissaatigineqarnissaa pisariaqartoq ataatsimiititaliaq isumaqarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut pingaarutilinnut aammalu aningaasanut inatsisissap suliarinerani sillimaffigereerneqarsinnaasimangitsunut tunngasuusassasut.

Aappattut ataatsimiititaliaq isumaqarpoq aviisinut nuna tamakkerlugu saqqummersartunut tapiissutitut aningaasaliissutitut Naalakkersuisut aqutsinerat ataatsimiititaliamit naatsorsuutitigineqartunut naapertuutinnitsoq. Konto pingaarnermi 10.06.24-imi, nunatsinni tusagassiutitut naqitanut tapiissutitut aningaasaliissutitut nuussinikkut aningaasaliissuteqarnissamik qinnuteqaatit ilaatigut aningaasalersorumaneqarnera ataatsimiititaliamit akueriumaneqanngimmat ilaatigut Naalakkersuisut siulittaasuani siunersuuinissamut aggeqqusissummi ataatsimiititaliamit nalunaarutitigineqarpoq. Tamatumunnga taarsiullugu konto pingarneq sorleq atorneqarsinnaasutut isigineqarsinnaanersoq Naalakkersuisut paasissutissiissutitigineqarpoq. Aningaasalersuutissanik allanik Naalakkersuisut siulittaasuata pissarsinerata kingorna ilassutitut aningaasaliissuteqarnissamik qinnuteqaat ataatsimiititaliamit akuerineqarpoq.

Sulianut marlunnut siuliani taaneqartunut atatillugu malitseqartitsissutitut ataatsimiititaliaq apeqqutitut arlalinnik Naalakkersuisut nassiussivoq. (Ilanngussaq B). Aviisinut nuna tamakkerlugu saqqummersartunut tapiissutitut pillugit suliamut tunngatillugu ataatsimiititaliap Kukkuinersuineranut Ataatsimiititaliaq ilisimatilersaarpaa.

9.6 Ilaasunik, nassiussanik allakkanillu Kalaallit Nunaata iluani assartuussisarneq pillugu kiffartuunneqarnissamut isumaqatigiissutitut nutaanik isumaqatigiissuteqarnissamut

**isumaqatiginninniarnert inernerisa akuersissuteqarfigineqarnerat (14-676) kiisalu
Kiffartuussinermik isumaqatigiissutit akuerineqarnissaat (14-678)**

Naalakkersuisut kissaateqarnerata malillugu suliassaq immikkut ittumik ataatsimiinnermi nukinginnartutut suliarineqarpoq. Suliaq annertummat suliap misissornissaanut pisariaqartumik piffissaqartinneqarnissaq ataatsimiititaliamit pisariaqartinneqarpoq aammalu Naalakkersuisut kissaatigisaattut ullumik ataasiinnarmik piffissaqartinneqarluni suliap suliarinissaa angumerisinnaanagu. Tamannli sioqqullugu qinersinissaq nalunaarutigineqarmat ataatsimiititaliamit nalunaarutigineqartariaqarsimavoq qinersisoqarnissaanik nalunaarutiginninnerup kingorna suliassat ataatsimiititaliamit tamakkiisumit isumaqatigiissutigineqarsinnaasut kisimik suliarineqarsinnaasut. Taamaattoqanngimmat ataatsimiititaliaq suliamik suliarinnissinnaasimangilaq.

Suliap kinguartinneqarsinnaannginnera pissutigalugu aammalu 2015-imi Inatsisartut aningaasanut inatsisigigallagaattut akuerineqartoq naapertorlugu Inatsisartut 2015-imi aningaasanut inatsimmik akuersissutiginninnissaasa tungaanut Namminersorlutik Oqartussat ingerlataannik akornutitaqanngitsumik ingerlatitsiinnarnissamut Inatsisartunit Naalakkersuisunut piginnaatitsissut tunngavigalugu ataatsimiititaliamit siunnersuutigineqarpoq suliassaqarfimmi kiffartuussinissamik isumaqatigiissutit atuuttut sivitsorneqarallarnissaat Naalakkersuisunit sulissutigineqassasoq.

Tamatuma kingorna suliap ingerlateqqinneqarnissaanik qinnuteqaammik Naalakkersuisut nassiussippot, tassani kiffartuussinissamik isumaqatigiissutit pioreersut sivitsorneqarnissaanik ataatsimiititaliap kissaataata kingunerisassai nassuiaatigineqarlutik.

Tamatumali kingorna ataatsimiititaliamit Naalakkersuisunut nalunaarutigineqartariaqarsimavoq suliap ingerlateqqinneqarnissaanik Naalakkersuisut qinnuteqaataat ataatsimiititaliap suliamut isumaanik allanngortitsinissamut tunngavissiinnngitsoq. Taamaattumik kiffartuussinissamik isumaqatigiissutit sivitsorneqarallarnissaat sulissutigeqqullugu qinnuiginninnini ataatsimiititaliap uteqqittariaqarsimavaa. Tamatuma peqatigisaanik taama sivitsuinerup kingunerisassai Naalakkersuisunit allaaserineqartut ataatsimiititaliamit tusaatissatut tiguneqarput.

Suliaq una pissutsit paasinarluartut pissutigalugit piffissami sivilunerusumi suliarineqartariaqarsimammat aammalu tamanna pillugu Naalakkersuisut naatsorsuutigisaannit allaanerusumik ingerlasimasorinarmat ataatsimiititaliamit ajuusaarutigineqarpoq. Ataatsimiititaliap suliami akisusaaqataanini soorunami pimoorussimavaa suliarlu suliassat ataatsimiititaliamut innersuunneqartut allat assigalugit suliarisimallugu. Ataatsimiititaliaq suliamik nr. 14-678-imik inaarutaasumik akuersinermini allappoq suliassat nassiunneqartut ataatsimiititaliamit akueriinnarnagit misissorneqaqqaartarnerat inatsisartoqarnermi suleqatigiinnerup ataatsimiititaliamit pimoorunneqarneranik ersersitsisoq.

Suliamut malitseqartitsissutitut ataatsimiititaliaq Naalakkersuisunut ulloq 23. marts apeqquteqarpoq. (Ilanngussaq B).

9.7 NunaMinerals A/S-imi aningaasaatinut akiliuteqarneq (14-679) kiisalu NunaMinerals A/S-imut aningaasaliissutissanik atorniarnissap allanngortinneqarnissaanut pisinnaa-titaaffiliinissaq (14-681)

Pisimasunut ataatsimiititaliaq allanik oqaaseqaatissaqanngilaq, suliarli pillugu paasissutissanik nu-taanik piaartumik pissarsisinneqarnissani kissaatigalugu Naalakkersuisunut 23. marts apeqqute-qarluni. (Ilanngussaq B).

10. Aningaasaqarnermut Akileraartarnermullu Ataatsimiititaliap kaammattuutai

2014-mi ilassutitut aningaasaliissutitut inatsisissatut siunnersuummik kiisalu Naalakkersuisut aningaasaliissutitut allannguutissatut siunnersuutaannik suliarinninnermini taakkunangalu malitse-qartitsisarnermit misilittakkani tunngavigalugit Naalakkersuisunut kaammattuutitik arlalinnik ukuninnga saqqummiussinissaminut Aningaasaqarnermut Akileraartarnermullu Ataatsimiititaliaq pissutissaqarsorivoq:

Kaammattuut nr. 1

Missingersuutitik qaangiinissaq pinngitsoorneqarsinnaanngitsoq erseqqitsillugu nunatta karsiata naatsorsuutaasa kusassarneqarnissaat siunertariinnarlugu ukiumi aningaasanut inatsisit atuuffiata naalernerani nuussinerit ingerlanneqartannginnissaannik Naalakkersuisut Aningaasaqarnermut Akileraartarnermullu Ataatsimiititaliamit kaammattorneqarput. Taamaattoqartillugu aningaasaliis-sutitik nuussisinnaatitaanerminnik Naalakkersuisut atuinngitsoorluarsinnaapput, tassungalu taar-siullugu nuussinissamik qinnuteqaammik Aningaasaqarnermut Akileraartarnermullu Ataatsimiitita-liamut saqqummiussillutik. Tassunga taarsiullugu missingersuutitik qaangiinermut pissutaasoq nunatta karsiata naatsorsuutaanut atatillugu naatsorsuutitut nassuiaatini ersarissarneqarsinnaavoq.

Kaammattuut nr. 2

Aningaasat Sanaartugassanut Iluarsagassanullu Aningaasaateqarfimmi atorneratik uninngaan-nartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasa-liissutitik atuinissamik piviusorsiorlumik missingersuusiortarnissamik qulakkeerinninniarnernin-nik Naalakkersuisut ingerlatsiinnarnissaat Aningaasaqarnermut Akileraartarnermullu Ataatsimiiti-taliamit kaammattuutigineqarpoq.

Kaammattuut nr. 3

Missingersuutit pillugit Inatsisartunut akuttunngitsumik ilisimatitsissutitik nassiussisarnerit Naalak-kersuisut piaartumik ingerlateqqilissagaat Aningaasaqarnermut Akileraartarnermullu Ataatsimiiti-taliamit kaammattuutigineqarpoq.

Kaammattuut nr. 4

Ilaatigut sullissinissamik isumaqatigiissutit aqutigalugit tapiissuteqartarneq pillugu ilassutitut anin-gaasaliissuteqarnissamik qinnuteqaatinik piffissaq eqqorlugu pilertortumillu nassiussisarnissaq nalinginnaasumik qulakkeerinniffigeqqullugu Naalakkersuisut Aningaasaqarnermut Akileraartar-nermullu Ataatsimiititaliamit kaammattorneqarput, taamaalilluni qinnuteqaatit taamaattut siumut sunnuteqartussanngorlugit akuerineqarsinnaaqqullugit.

11. Aningaasaqarnermut Akileraartarnermullu Ataatsimiititaliap inassuteqaatai

Inatsisissatut siunnersuutip akuerineqarnissaanut inassuteqaateqarnissani Aningaasaqarnermut Akileraartarnermullu Ataatsimiititaliap isumaqatigiittup siunnersuutip pingajussaaneerseqarnissaanut kinguartippaa. Tamatumunnga pissutaavoq ataatsimiititaliap apeqqutaanut Naalakkersuisut akissutaasa suliarineqarnissaannut piffissaqarnerunissani ataatsimiititaliap kissaatigimmagu. Tamatuma peqatigisaanik ataatsimiititaliamit inassutigineqassaaq immikkoortoq pingajussaaneerseqannginnermini Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqassasoq.

Taama oqaaseqarluni Inatsisartut Aningaasaqarnermut Akileraartarnermullu Ataatsimiititaliaata Inatsisartut 2014-mi ilassutitut aningaasaliissutitut inatsisissaattut siunnersuut aappasaanigassanngortippaa.

Jens Immanuelson,

siulittaasoq

Steen Lynge

Jess Svane

Tillie Martinussen

Naaja Nathanielsen

Sara Olsvig

Peter Olsen